

BOSANSKOPETROVAČKI VJESNIK

Mjesečnik Općine Bosanski Petrovac



Uređuje: Kabinet Općinskog načelnika, tel.: 037/883-570 i 037/883/571, fax: 037/881-012, e-mail: opcinabp@bih.net.ba

Petrovačka dijaspora

Dana 28.7.2017. godine, kao završna aktivnost uspješno realizovanog projekta „Otvaranje kancelarije za saradnju sa dijasporom“, organizovano je Prvo veče petrovačke dijaspore, u seoskom domaćinstvu Čardaklije, u Bosanskom Petrovcu.

Na ovom mjestu okupili su se Petrovčani koji žive i rade u inostranstvu, ali i oni koji žive ovdje.

Veče je bilo posvećeno upravo onima koje „životni put odvede, i onima koji su otišli trbuhom za kruhom, i koji iznjedri ljuti krajiški kamen i ova naša crnica zemlja...“.

Na samom početku, obratio se domaćin večeri, načelnik Zlatko Hujčić, koji je pozdravio sve prisutne, i one koji nisu mogli doći, ali su srcem i mislima sigurno u rodnom kraju.

Dalje se u svom obraćanju osvrnuo na sam proces otvaranja kancelarije, a cilj je povezivanje iseljenika sa maticom, odnosno svojom Opštinom.

Isto tako, naglasio je da je potreban zajednički rad kako bi se stvorili bolji uslovi za kulturnu, sportsku, obrazovnu, privrednu i svaku drugu saradnju.

Nakon načelnika, prisutnima se obratio Igor Kapetanović, savjetnik za razvoj poslovanja, USAID (Agencija SAD za međunarodni razvoj), kao i privrednik Jusuf Arifagić.

„Zadovoljstvo mi je prisustvovati ovom fantastično organizovanom skupu. Očaran sam Krajinom i bez imalo uveličavanja, rekao bih da je ovo najljepši komad zemlje na planeti“, istakao je Kapetanović, podijelivši sa prisutnima svoja iskustva, sugestije i prijedloge vezano za uspostavljanje saradnje sa dijasporom.

U svakom slučaju možemo računati na njihovu pomoć, istakao je na kraju.

„Svi mi imamo u sebi genetski kod koji nas vodi ka tome da pomognemo svojoj zemlji, tako sam i ja slušao glas svog srca i duše i vratio se u Bosnu i Hercegovinu, pokrenuo svoje investicije“, rekao je Jusuf Arifagić.


Sljedeći govornik je bila gospođa Bobana Velaga Lipić, predsjednica Projektnog tima u Opštini Bosanski Petrovac, govoreći o procesu nastanka i programu budućeg rada ovog projekta.

Inače, ovaj skup je finansiran od strane Ministarstva za ljudska prava i izbjeglice BiH, u Sarajevu.

U kulturno-zabavnom dijelu programa, prisutni su imali priliku čuti citate Miše Marića, iz odlomka knjige „Bosanskopetrovački velikani kulture“, koje je upečatljivo čitala Dušica Korda.

Tokom večeri, prisutne su zabavljale domaće grupe „Runolist“ i „Drvosječe“, kao i muzičari „Ečo i Mešak“.

Ubjeđeni da će ova manifestacija postati važna za razvoj našeg grada, u smislu uspostavljanja kulturne, poslovne i svake druge saradnje sa našom dijasporom i šire, prisutni su uz prigodnu večeru, napustili ovo lijepo etno selo prije same ponoći.



Pozdravna riječ načelnika Zlatka Hujčića



Opuštena atmosfera na Čardaklijama...

Potpisani ugovori sa Fondacijom Mozaik

Dana, 4.7.2017. godine, u maloj Sali, potpisani su Ugovori o dodjeli i korištenju bespovratnih novčanih sredstava između neformalnih grupa mladih iz naše Opštine i Fondacije Mozaik. Četiri neformalne grupe mladih su ideju za četiri projekta stavili na papir, prošli niz selekcija u okviru turnira braneći boje našeg grada.

Projekti, „Lutkarska predstava“, „Isti smo“, „Borilačkim sportovima protiv negativnih uticaja savremene tehnologije“, „Nezainteresovanost mladih za sport i zdrav način života“, realizovat će se u našoj opštini u narednom periodu, i nastojat će okupiti mlade ljude oko korisnih stvari, te dati mogućnost za razvijanje njihovog poduzetničkog stava i kreativnosti.

Planirani fond Omladinske banke Bosanski Petrovac u 2017. godini za projekte iznosi 11.100 KM (Opština Bosanski Petrovac 6.750 KM- 60% i Fondacija Mozaik 4.350 KM-40%).

Realizacija odobrenih projekata planirana je u periodu od 1.07-15.09.2017. godine.

Četiri neformalne grupe čine članovi: Tijana Grbić, Alen Hujić, Marko Kecman, Danijela Latinović, Fikret Muratović, Slađan Trninić, Elvira Alić, Delila Bećirović, Benjamin Ferizović, Dženneta Nur Mehić, Đejlana Mehić, Šejla Salihović, Jovana Budimir, Snežana Čulibrk, Belma Gutlić, Nikolina Mrđa, Nirvana Ferizović, Azra Ferizović, Milica Latinović, Elma Mešić, Edisa Nukić, Adisa Nukić, Valentina Savić, su pokazatelj da naša Opština ima mlade ljude koji svojim radom nastoje poboljšati prilike i sredinu u kojoj živimo.

Značaj organizovanja i učešća mladih ljudi je višestruk. Osim druženja i međusobnog upoznavanja, mladi imaju priliku da proširuju svoje vidike, postaju obrazovaniji i informisaniji građani svijeta. Samo kao takvi mogu graditi korisno društvo.



Članovi neformalnih grupa...

Potpisan ugovor o saradnji između lokalnih zajednica u RS i FBiH

Dana, 4.7.2017. godine je u Banjoj Luci potpisano šest grant ugovora o saradnji između lokalnih zajednica u Republici Srpskoj i Federaciji BiH, među kojima su četiri opštine sa našeg područja: Petrovac, Drvar, Istočni Drvar i naša Opština.

Riječ je o međuopštinskim projektima iz oblasti plateničke proizvodnje, kulture, obrazovanja, nasljeđa i javne bezbjednosti, vrijednosti od 5.000-10.000 eura.

Gore navedene Opštine, među kojima je i naša, predstavljaju klaster 1, s tim da je Opština Bosanski Petrovac nosilac projekta.

Projekat će donijeti po dva platenika svakoj Opštini, a bit će uručeni ženama iz socijalno ugroženih porodica, sa većim brojem djece.

Najavljen je i naredni projekat, „Podrška multietničnom dijalogu mladih ljudi na opštinskom nivou u Bosni i Hercegovini“ o kojem je naša Služba dobila informaciju 3.7.2017. godine, od strane Vijeća Evrope, a koji će početi sa provođenjem do kraja godine.

Šef Odjeljenja za mjere izgradnje povjerenja Direktorata za politička pitanja Savjeta Evrope, Ana Kapelo, koja je sa načelnicima opština potpisala ugovore, navela je da su projekte, vrijedne ukupno 50.000 eura, radili predstavnici opština u skladu sa potrebama stanovništva.

„Nadamo se da će ovaj projekat biti prvi korak razvijanja saradnje između opština. Finansirani projekti su raznovrsni, od podrške razvoju zelene proizvodnje i ženama, do izgradnje dječijeg igrališta. Sredstva su značajna s obzirom na kategoriju kojoj ćemo dodijeliti platenike. Nadamo se da će našim ženama ovo pomoći i pružiti veću nadu za bolju budućnost“, rekao je načelnik Hujić.



Potpisivanje Ugovora o saradnji (načelnik Hujić i Ana Kapelo, Šef Odjeljenja za mjere izgradnje povjerenja)

Posjeta predstavnika IPA fonda

Predstavnici IPA fonda (IPA fond je instrument za pretpristupnu pomoć koji je namjenjen pružanju podrške zemljama kandidatima, kao i potencijalnim kandidatima za članstvo u Evropsku uniju), Bouryana Konaklieva i Jozef Richtarck su, dana 12.7.2017. godine posjetili Opštinu Bosanski Petrovac, gdje ih je primio Opštinski načelnik Zlatko Hujić.

Cilj sastanka je analiza do sada provedenih aktivnosti na projektu Izgradnja i rekonstrukcija kanalizacione mreže i postrojenja.

Sastanku su prisustvovali članovi PIT-a, predstavnici Komunalnog preduzeća i predstavnik centralnog nadzora.

Načelnik Zlatko Hujić je poželio dobrodošlicu i zahvalio se na posjeti, naglasivši da je projekat odvodnje i pročišćivanje

otpadnih voda najveći projekat, ukupne vrijednosti (kanalizacija i prečišćivač), od 6 miliona KM, koji se realizuje u našoj Opštini, kao i da je od velikog značaja za naše građane, kojima će zaštitom okoliša biti osiguran zdraviji i kvalitetniji život.

O implementaciji sredstava IPA fonda i provedenim aktivnostima, prisutne je upoznao Huse Jukić, predsjednik opštinskog tima za implementaciju projekta.

Gospođa Bouryana Konaklieva je u svom dijelu izrazila zadovoljstvo što je naša Opština u roku i cjelokupni iznos sredstava realizovala na najbolji način, te naglasila da smo u cijeloj BiH primjer uspješnosti realizacije ovog projekta.

U drugom dijelu sastanka razgovaralo se o mogućnostima daljeg finansiranja IPA fonda i fondova Europske unije.

Nakon sastanka u kabinetu, obavljen je i obilazak terena, gdje će uskoro početi izgradnja prečišćivača otpadnih voda.



Sastanak u Kabinetu načelnika...

Započela realizacija projekta "Kompostiranje bio-otpada"

Obrzirom na postignuća u provedbi projekta "Kompostiranje bio-otpada na području regije Bihać", koji je realiziran u posljednje četiri godine u saradnji sa lokalnim zajednicama, Ministarstvo za građenje, prostorno uređenje i zaštitu okoliša Unsko-sanskog kantona i 2017. godine, obezbijedilo je sredstva za implementaciju istoga kroz Program raspodjele namjenskih sredstava.

Iz tog razloga, dana 19.7.2017. godine, u prostorijama naše Opštine održan je sastanak sa predsjednicima trinaest mjesnih zajednica.

Cilj sastanka je bio upoznavanje sa dinamikom planiranih aktivnosti, sa dostavljanjem promotivnih materijala (letaka i plakata), koji će se distribuirati u mjesne zajednice, kao i predstavljanje dokumenta koji se odnosi na Pravila učešća u projektu.

Inače, ovaj projekat će se implementirati na području koje obuhvata 8 lokalnih zajednica Unsko-sanskog kantona: Bihać, Ključ, Bosanska Krupa, Bužim, Cazin, Sanski Most, Velika Kladuša i Bosanski Petrovac.

Učesnice projekta su mikrolokacije navedenih opština, odnosno mjesne zajednice.

Samo kompostiranje bio-otpada predstavlja kontrolisan proces pri kojem se organski otpaci, pomoću aktivnosti organizama

koje žive u tlu (bakterije, gljivice, sitne životinje) i uz prisustvo kiseonika, pretvaraju u humus koji nije neprijatnog mirisa i može se koristiti kao organsko đubrivo.

Projekat se treba implementirati u periodu do 6 mjeseci, a provođenje će trajati od mjeseca juna do novembra 2017. godine.

Shodno navedenom, dana 12.7.2017. godine, u Bihaću je održan sastanak sa predstavnicima lokalnih zajednica Kantona, na kojem je učestvovala i predstavnik naše Opštine.

Postavljena dva nova plastenika

Protekle sedmice na području naše Opštine izvršena je podjela i postavljanje dva plastenika, koja su donirana od Vijeća Evrope, porodicama u stanju socijalne potrebe.

Riječ je o porodicama Lončar Slavice, iz Krnjeuše, i Kerkez Mersije iz Rašinovca.

Lončar Slavica ima troje djece, nezaposlena je, bavi se poljoprivredom, dok Kerkez Mersija ima četvero djece.

Cilj projekta jeste konkretna i materijalna pomoć za socijalno ugrožene porodice kroz proces upošljavanja u intenzivnoj poljoprivrednoj proizvodnji s ciljem pridruživanja procesu poljoprivredne proizvodnje na nivou lokalne zajednice.

Osim plastenika čija je površina 100 m², korisnici su dobili i sisteme za navodnjavanje, sadnice krastavca, te će u narednom periodu dobiti prihranu i zaštitu za navedene sadnice.

Napominjemo da je Opština u saradnji sa Poljoprivrednim zavodom izvršila analizu zemljišta korisnika, te će na osnovu analize odrediti odgovarajući sistem prihrane i zaštite.

Inače, ovaj međuopštinski projekat iz oblasti plateničke proizvodnje rezultat je saradnje između lokalnih zajednica u Republici Srpskoj i Federaciji BiH, među kojima su četiri opštine sa našeg područja: Petrovac, Drvar, Istočni Drvar i naša Opština.

Navedene opštine, među kojima je i naša, predstavljaju klaster 1, s tim da je Opština Bosanski Petrovac nosilac projekta.

"Obzirom da je svrha ovog projekta pomoć socijalno ugroženim porodicama, smatram da će ovaj projekat mnogo pomoći u njihovoj egzistenciji kao i njihovom budućem zapošljavanju. Na ovaj način ćemo steći uslove da korisnici imaju dodatna primanja kako bi poboljšali svoj budžet i na takav način doprinjeli boljem životu svoje porodice", rekao je načelnik Zlatko Hujić.



Porodica Lončar

Učenici generacije

Dana, 5.7.2017. godine, u kabinetu načelnika Opštine Bosanski Petrovac, upriličen je prijem za Mehmeda Kvakića, učenika generacije OŠ „Ahmet Hromadžić“, Mariju Bulajić, učenicu generacije MSŠ „Bosanski Petrovac“, roditelje i direktorice Mujesiru Kavaz i Besimu Kišljen.

Tokom prijema načelnik Zlatko Hujić je uručio novčanu nagradu od po 1.000 KM, za oba učenika, te im je poručio da i dalje nastave učiti. Također, u svom obraćanju načelnik je istakao da je titula učenika generacije plod, ne samo samostalnog rada, nego i zajedničkog truda roditelja, nastavnika i profesora. „Ovaj događaj je od bitne važnosti za učenike, jer će ostati u sjećanju činjenica da su se u ovom teškom vremenu učenici uspjeli pozitivno istaknuti i prepoznati prave vrijednosti“, rekao je načelnik Hujić.

Ovom prilikom Opštini su se zahvalili i roditelji koji su poručili da će ova gesta biti dugo u sjećanjima učenika, kao motivacija u daljem uspjehu.

Zadovoljstvo, nakon uručjenja nagrade moglo se vidjeti i na licima učenika generacije Marije i Mehmeda, koji su istakli da će im ovo pomoći u daljem školovanju.

Marija Bulajić je upisala Medicinski fakultet u Banjoj Luci, a Mehmed Kvakić srednju medicinsku školu u Bihaću.



Učenici generacije i roditelji na prijemu kod načelnika Opštine

“Prva kosa Grmeča”

Obronci planine Grmeč, sa bosanskopetrovačke strane, u nedjelju, 9.7.2017. godine, su bili u znaku kosidbe, tj. 9. po redu međunarodne i već tradicionalne manifestacije “Prva kosa Grmeča”, koja je okupila nekoliko stotina posjetilaca iz BiH i zemalja okruženja.

Selo Smoljana bilo je i ove godine dobar domaćin najboljim koscima BiH, Srbije, i Slovenije, koji su i ovaj put otišli zadovoljni, pobjednici sa nagradama, a i oni koji nisu osvojili nagrade smatraju se pobjednicima, jer su prevalili dug put da uveličaju manifestaciju, koja prevazilazi granice lokalnog i prelazi u zbor međunarodnog karakter.

Tako je titulu najboljeg kosca, trofej “Latinović Stanko-Stankela”, osvojio Nedeljko Kerlec iz Janja, čije su brzina, umijeće i snaga bili presudni. Dalje, u konkurenciji za ovaj trofej, drugo mjesto zauzeo je Milorad Sladojević iz Mrkonjić Grada, dok je treći bio Vuk Vučković iz Srbije.

Pored toga, kosci su se takmičili i ekipno, a u toj konkurenciji prvo mjesto su osvojili gosti iz Slovenije.

Ove godine, organizator je upriličio i takmičenje pionira, juniora, seniora i veterana, čak se u koševini okušala i prva učesnica iz Srbije, koja je dobila zasluženu nagradu i priznanje.

Gosti i posjetioc i ove manifestacije su nakon nadmetanja kosaca, mogli uživati u kosačkom ručku koji su pripremili domaći kuvari, potom i u kulturno-zabavnom programu, gdje su nastupile krajiške grupe “Runolist”, “Mrkonjić Grad”, “Drvar, izvorna grupa “Drvosječe” i KUD Drvar, kao i djevojčice koje su imale ulogu vodonoša.

Na kraju, manifestaciju je zatvorio Mirko Kecman, višestruki pobjednik svih kosidbi na Balkanu, ovogodišnji organizator manifestacije, koji je uručio zahvalnice i nagrade svim učesnicima ističući da je cilj ove “Prve kose Grmeča” duhovno i kulturno uzdizanje naroda MZ Smoljane, ali i šire, vraćanje tradiciji, te promovisanje našeg bosanskopetrovačkog sela i seoskog turizma.

Također, istakao je da je nastojao sjediniti sva svoja iskustva sa brojnih takmičenja, da bi ova manifestacija, održana u našoj Opštini bila ponos naših građana.

Glavni sponzori su: Opština Bosanski Petrovac, Opština Drinić, ŠG Oštrelj-Drinić, Borislav Popović, Drago Kragulj, Milan Marjanac, vlasnik firme “Vitorog”, a podršku je pružila i MZ Smoljana, na čelu sa predsjednikom, Marinkom Mrdom.

Pored mnogobrojnih gostiju, prisustvovali su i načelnici Drinića, Bosanskog Grahova, Milan Grbić i Duško Radun, direktor ŠG Oštrelj-Drinić, kao i načelnik naše Opštine, Zlatko Hujić.



Učesnici- pobjednici „Prve kose Grmeča”



Djevojke- vodonoše...

Izlet u Zoološki vrt, Zagreb

U petak, 7.7.2017. godine, Opština Bosanski Petrovac, u saradnji sa udruženjem „Podsrnetica“, organizovala je besplatan izlet u ZOO vrtu u Zagrebu, za 40 djece iz socijalno ugroženih porodica i djece sa posebnim potrebama sa evidencije „Centra za socijalni rad“ Opštine Bosanski Petrovac.

Napominjemo da je ovaj projekat prvobitno započet od strane „Centra za kulturu i obrazovanje“, koji, međutim, nije nastavio započeto, te je Opština Bosanski Petrovac na sebe preuzela organizaciju ovog humanog izleta.

U pratnji djece, pored medicinske sestre, Nisvete Mešić, i Sabine Halilagić, socijalne radnice iz Bihaća, bili su i volonteri Opštine Bosanski Petrovac (Izeta Ferizović, Miloš Kerkez i Dušica Korda)

Polazak je bio sa autobuske stanice u našem gradu, dana 7.7.2017. godine.

Osmijeh na licima i oduševljenje prvi put ugledanih životinja, nisu nestajali tokom cijele dvosatne posjete.

Visoka temperatura i umor od puta, nisu ih spriječili da obidu sve životinje, poput lava, vuka, aligatora, majmuna, slijepih miševa, crvene pande, morskog lava i mnogo drugih...

Nakon obilaska, veselo društvo se uputilo na zasluženi ručak u McDonald's, u Zagrebu.

Poslije ručka, obogaćeni novim iskustvima i doživljajima, grupa iz Bosanskog Petrovca se uputila svojim kućama.

Na kraju, na autobuskoj stanici, djecu i pratnju dočekaao je načelnik Opštine Zlatko Hujić, koji je poželio svima dobrodošlicu, i kome su se roditelji i zahvalili na realizovanoj ideji, obzirom da je troškove ovog nezaboravnog putovanja, u cjelini snosila Opština Bosanski Petrovac.

Načelnik je obećao da se neće stati sa ovakvim izletima i svakim drugim oblicima pomoći koja našu djecu čini radosnim.

**UPOZORENJE SVIMA:
ŠTEDITE VODU!
PAŽNJA-POŽARI!**



Ispred Zoološkog vrta...



U Zoološkom vrtu...



Iščekujući ulazak u zoološko carstvo...

PROMOCIJA KNJIGE “IZGUBILA ŽIVOTNU BITKU, POBIJEDIT ĆE LAFORINU BOLEST”

Dana, 14.7.2017. godine u Vijećnici naše Opštine predstavljena je knjiga “Izgubila životnu bitku, pobijedit će Laforinu bolest”, autora Snježane Gajić, majke koja je izgubila jednu od dvije kćerke oboljele od Laforine bolesti.

Na promociji knjige učestvovali su Draško Stanivuković, Dajana Smiljanić, i autorica Snježana Gajić.

“Ovo nije knjiga samo u književnom smislu riječi, ovo je jedna istinita životna priča, koju sam željela prenijeti na papir. Knjiga je pisana srcem i dušom”, rekla je Gajićeva.

Kaže da je sebi dala zadatak, četrdeset dana poslije odlaska kćerke Tatjane, da na papir prenese sve ono čega je bila svjedok, znači sve što se dešavalo i da na neki način djeluje motivaciono na ljude kojima se dese neke slične stvari u životu.

“Probala sam kroz knjigu da prenesem poruku da ništa nije nemoguće i da koliko god strašno bilo ono što nam se može desiti u životu da uvijek, ali uvijek, postoji nešto što možemo učiniti i na što možemo uticati”, istakla je Gajićeva.

Doktorica Gajić je i učinila, pokrenula je aktivnost na prikupljanju sredstava za istraživanje i pronalazak lijeka za ovu okrutnu bolest i sva sredstva usmjerila u kliniku “Sik Kids” u Torontu, odnosno timu doktora koji rade na tome da nađu lijek.

Saopštili su im da bi lijek mogao biti u upotrebi već krajem godine. To je nova nada za mlađu kćerku Milanu.

O Laforinoj bolesti snimljen je i dokumentarni film “Lica Lafore”, režisera Denisa Bojića, koji će biti prikazan u Barseloni, na kongresu neurologa.

Promociji je, pored predstavnika kulturnog i javnog života, građana, omladine, prisustvovao načelnik Opštine Zlatko Hujčić.

Na kraju, posebne emocije izazvala je Tacina himna ljubavi, pjesma posvećena kćerki koja je izgubila životnu bitku, ali je “saučesnik” u pobjedi Laforine bolesti, što je i smisao promocije.



Publika u Vijećnici...



Promotori: Draško Stanivuković, Dajana Smiljanić i autorica Snježana Gajić (u sredini)

„Zemljotres“ u Bosanskom Petrovcu

Uveče, 29.7.2017. godine, na Gradskoj bini, u srcu Bosanskog Petrovca, organizovan je koncert legendarne bosanskopetrovačke rock grupe „Zemljotres“.

Uz rock simfoniju i izvođenje nezaboravnih i najpoznatijih hitova, prisutni su plesali i uživali pod petrovačkim zvjezdanim nebom.

Publika je bila svjedok koncerta koji povezuje sve generacije, a rezultat je entuzijazma, ljubavi prema muzici i rodnom gradu gdje je sve i počelo.

Na kraju noći za pamćenje, Petrovčani su gromoglasnim aplauzom i na nogama ispratili članove grupe, željno iščekujući sljedeće petrovačko ljeto za ponovno druženje.

Organizator ovog lijepog druženja je Opština Bosanski Petrovac, koja kao i uvijek dokazuje postojanje kolijevke i plejade talenata.

Poslije Narodnog zbora, 27. jula, i Večeri petrovačke dijaspore, 28. jula, i ovo je bilo veče za pamćenje i jačanje kolektivnog duha svih žitelja naše Opštine.



Grupa „Zemljotres“ na Gradskoj bini



Brojna publika pod petrovačkim nebom...

Proslava Dana ustanka protiv fašizma na Medenom Polju

Veliki broj Petrovčana, ali i gostiju okupilo se 27. jula na Medenom Polju, u Bosanskom Petrovcu na narodnom zboru na kome je obilježen 27. juli-Dan ustanka naroda Bosne i Hercegovine protiv fašizma. Organizatori ove manifestacije su Općina Bosanski Petrovac u saradnji sa Centrom za kulturu i obrazovanje i organizacionim odborom.

Prisutni su mogli da uživaju uz kulturno-zabavno-sportski program, a posebna atrakcija ovogodišnje manifestacije bili su letovi motornih letjelica sa Aerodroma Medeno Polje, koje su izveli članovi Aero centra iz Banje Luke i Bihaća, kao i padobranici, koji su maestralno izvodili svoje skokove, na opšte divljenje prisutnih posmatrača.

Poznato je da je letilište na Medenom Polju korišteno za sportske aktivnosti i u bivšoj Jugoslaviji. Većina stanovnika se ovog aerodroma sjeća iz filma "Partizanska eskadrila", kao prvog partizanskog aerodroma, na kojem je i snimljen film. Slavna istorija ovoga Polja je naročito prepoznatljiva, po ratnim operacijama iz Drugog svjetskog rata, kada je ovdje sletio i sin Vinstona Čerčila (Randolf Čerčil).

U sklopu kulturno-zabavnog programa Petrovčane i ostale goste zabavljale su naše izvorne grupe "Runolist" i "Drvosječe", kao i muzičari Ećo i Mešak.

Prirodne ljepote kojima smo okruženi, Osječenica, Klekovača, Grmeč i medno Medeno Polje, čist vazduh, jučer su mogli da vide i osjete svi koji su prisustvovali manifestaciji.

Kao zvijezda manifestacije nastupio je poznati glumac Josip Pejaković koji je izveo monolog u svom prepoznatljivom stilu, a sve na kraju, završio pjevajući sa Drvosječama.

Antifašistička borba počela je iz ovog kraja, pobijeden je fašizam u Drugom svjetskom ratu, upravo zahvaljujući i ovom mjestu, Aerodromu Medeno Polje, koji je bio ključno mjesto za nekoliko prelomnih događaja, a Petrovčani su na ovaj način odali poštovanje samom mjestu i njegovoj ponosnoj istoriji.

Na kraju, ono što je najvažnije, jeste činjenica da je naša Opština jedna od rijetkih koja proslavlja ovaj istorijski značajan datum, ali i to što narodno veselje na Medenom polju 27.jula nastavlja tradicija proslave borbe protiv fašizma, koja, zapravo, nikada ne treba prestati.



Spuštanje padobranca na Medeno polje



Aerodrom Medeno polje snimljen iz aviona



Igrali smo kolo...

Konji na Štraparijadi u Driniću...



Važni brojevi u Općini Bosanski Petrovac

Policija	122
Hitna pomoć	124 ; 883-687
Vatrogasci	123
OPĆINA BOSANSKI PETROVAC	883-570

**Slušajte Radio Bosanski
Petrovac od 15:00-17:00,
svakim danom na 90.9 MHz fm**